

1397

(2

**LA NFERTA**  
**PE LO CAPODANNO**  
**DE LO**  
**1858.**



**NAPOLE**  
Da li Truocchie de la Sozietà Felemateca.



*Nata Nferta? mmalora ! è seccatura ;  
Ed ogne bello iuoco poco dura.*

## CHIACCIARIATA

*Dint a no Cafè ntra duie ammicce ,  
Ntonio , e Micco.*

*N. Micco mio , mo nce stammo fummano no  
sicario ; e annevina a che sto penzanno ?*

*M. A che staie penzanno ?*

*N. A la soleta Nferta che ntra poche iuorne  
se stamparrà.*

*M. Se vede , Ntonio mio , che tiene poco a  
che penzà.*

*N. Io soffro de ppocondria ; e co chillo libbre-  
tiello me la faccio passà pe no quarto d' ora.*

*M. E ttutto l' ate riesto de l' anno comm' ar-  
remmiedie a ssa ppocondria ?*

*N. Leianno li giornale , e ssofestecanno chille  
che songo palloniere , e cchille che dicenno le  
beretà.*

*M.* Sso iodicio lo faie porzì oo la Nferta?

*N.* Tanto bello : ma tengo na regola, ed e cche-  
sta. Quanno trovo cose che toccano a mme ,  
le dechiaro boscie : Quanno songo botte a le  
spalle de l' altre , le ttengo pe beretà,

*M.* E cchesso mo comme se magna?

*N.* Mo me spiego meglio. Pe n'asempio, la Nferta  
criteca gli pagliette, e tribunualiste mbrogliu-  
ne? e ttanno io dico : dalle, comme disse nter-  
ra ! Coffeia li miedece-ananescarche? ed io re-  
preco : benedetta tutta ! Miettele ncopp'a no  
puorco , ca n'aie raggione. Ma quanno po  
mette mano a li modiste, a li triatante, a li  
fummature, a li nnamorate, eccetera, me  
votano li canchere, e sfoco : pepitola a ssa  
lengua ! Bosciarda de lo deiavolo ! No nce  
fruscià ! No ssaie zo che ne vutte !

*M.* Levame na curiosetà : aie addimmannato  
maie a quacche miedeco straviso, o a quac-  
che straccia-facenne de tribunale, che di-  
ceno de ssa Nferta?

*N.* No.

*M.* E mmo te lo dico io, ch'aggio parlato co  
cchiù d' uno de lloro. Diceno : Ciuccia la  
Nferta ! e cciuccione l' aotore de la Nferta !

Ncagno de frustà li Don Liccarde e li Don Limune co chelle sciammerie redicole, e ncagno de coffeià li pierde-tiempe de Cafè, e de triato, li smiccia-barcune de Toletto, e li signure-cocchiere, mette vocca a li professure de la vita, e de la robba, che songo li miedece, e li pagliette. Marisso mperò si ncappa mmano a nnuie: lo volimmo fa comm'a n'ora de notte.

*N.* Li letture dicenno chesso; ma va te pesca che derrà l'aotore de la Nferta.

*M.* E pporzi lo ssacció, ca me l'ave assecurato no compariello suio. Dice che la criteca generale è ccomm'a no specchiettiello nfacce a na poteca de reveunetore: si s'accosta a mmerarse no scartellato, no quercio, no sciaccato, se pò piglià collera co lo specchio, che le mosta lo defietto suio? non signore.

*N.* Donca, doppo che cacciammo li denare pe ssentirce le ccorna noste, avimmo tuorto appriesso?

*M.* E cchi t'obbreca ad accattarte la Nferta?

*N.* E pure dice buono: mo faccio na bella penzata: addimmanno primmo a lo stampatore si la Nferta d'aguanno parla de cose che po-

gneno a mme : si è accossì, faccio passo ; se  
no, me l'accatto pe cchella tale ppocondria.

**M.** Siervete a ggusto tuio : ntramente lo sicario  
è ffenuto , ed io me ne vaco a la Villa.

**N.** Statte buono , e a rrevederce craie a sto Cafè.

### A LA MUSA.

**Musa** mia, che staie sorchianno  
D'Ippocrene le bell'onne,  
Che te fanno recreià ;  
Sta venemo Capodanno ;  
Si lo chiamme, te responne :  
N'ata Nferta vuoie mpacchià ?  
**Ma** si tiene chisso sfizio,  
Siente primmo, siente buono  
Chi sse ccose pò nzegnà.  
Fora canto a precepizio,  
Che de Marzo pare truono,  
E bo tutto sinnacà.  
**Me** derraie ca chessa sferza  
Non pe mmale, ma pe bene  
Tu faie sempe scassià ;  
**Pocca** vide che a la smerza  
Va lo munno, e ttu addò tene  
Lo vuoie proprio carfettà.

Musa capo de cavallo ,  
Statte zitto, ch' esce feccia ;  
No mme fare vommecà.  
Chi te mette a cchisso bballo ?  
Chisso niro de la seccia  
Chi te chiamma a ghianchià ?  
Quanno vide ntribunale  
No paglietta , che lo rimmo ,  
Non la penna avria a ttocà ;  
E ssaglienno chelle scale ,  
Li prociesse vole primmo ,  
E la ggente po spoglià :  
Quanno vide chiatto e ttunno .  
N' ante-fiseco dottore ,  
Che latrino vo parlà ;  
E atterranno miezo munno ,  
Dice po ch' agnuno more ,  
E nnesciuno ave a rrestà :  
Quanno siente che l' ammore  
Fa na ddamma a cinquant' anne ,  
E sse vo vroccolià :  
Che no stupeto signore  
Chino zippo de malanne  
Ntutta moda vo ammarcià :

Che facenno sempe zelle  
Tante nobbele scadute ,  
Vonno ire a belleggià :  
Che le spose , e le zetelle  
Cchiù spogliate ca vestute  
Vanno a Chiaia a passìa ;  
Tanno cride , Musa mia ,  
Co ssonà lo calascione  
Ssi sconcierte d' accordà ?  
No , non sponta chessa via ;  
No nce arriva la canzone ,  
Nce vol' altro che sonà.  
Ccà nce vonno le barrate  
Che tte soleno into Bare  
Li cecate conzegnà.....  
No ! nce vonno cannonate  
A mmetraglia , pe sperare  
Sse ccervella d' acconcià.....  
Oh mmalora ! Tu me faie ,  
Musa mia , co ll' uocchie signo ,  
Ca pe fforza vuoie sfocà.  
Sfoca pure nzin' a craie :  
Ma si falla lo designo ,  
Io non t' aggio che te fà.



## LO TRADEMIENTO

**Peppina me decette :**

Quanno no ciuccio co no zumpo arriva  
A ttoccare le stelle ,  
Io tanno te farraggio iacovelle.  
Ciucce de tutto Io neverzo munno ,  
Mo v' attocca de fà sso bello sauto :  
M' ha chiantato Peppina , e sposa n' auto.

### A BERTA , CECATA CO N' UOCCHIO

**Non t' affriggere , Berta :**

Tu essenno sfatecata ,  
Sempe festa facive ogne ghiornata :  
E mmo che tiene chiusa na fenesta ,  
E l' ata sempe aperta ,  
Annevina che faie ? faie meza festa.

## LO PAGLIETTA DE CARNEVALE.

Vecco ccà, vecco ccà Don Nicola,  
Lo paglietta de cinco a tornese.  
A lo Muolo io so ghiuto a la scola  
Qua Rinardo a mmezzarme a rrobà.  
Io le legge cchiù becchie, e cchiù nove  
Saccio a mmente da capo nfì a ppede:  
Ma l' articolo po trentanove  
De proposeto pozzo stampà.  
Io defenno de tale maniera  
Cbelle ccause cchiù storte e sballate,  
Ca na cosa ch' è sporca, ed è nera,  
Faccio ianca, e ppolita parè.  
Si quarcuno, e ssia mprubbeca strata,  
Ha scannato n' ammico, o nemmico,  
Io farraggio ssa bella colata  
Ncuollo a quacche nnozente cadè.  
Chi non bo lo pesone pavare,  
Io co tanta caville, e ppapocchie  
Lo farraggio porzì rialare,  
Pe ppotere la chiave tornà.

Chi ha firmate cambiale , e bolesse  
Pe ttruffare la firma negare ,  
Venga ccà , ch' io na causa de chesse  
Quarant'anne la faccio durà.

Si ha bbesuogno d' avere quarcuno  
Testemmonie o ndefesa , o nn' offesa ,  
Ncaparrato ne tengo cchiù d' uno ,  
Che sa ddi mo no si , mo no nò.

Si avanzate ad usura denare ,  
E ttenite lo pigno , ve faccio  
O pe craie li felusse tornare ,  
O lo pigno ncantare da mo.

Truffature , fauzarie , mbrogliune ,  
Guappe e mpise de tutto lo munno ,  
Io ve faccio valè le rraggiune ,  
Che tenite da venne , e ddonà.

Vecco ccà , vecchio ccà Don Nicola ,  
Lo paglietta de cinco a ttornese.  
A lo Muolo io so ghiuto a la scola  
Qua Rinardo a mmezzarme a rrobba.

LA BONA PASCA A PEPPINA

L' uocchie te scereca, Peppina cara,  
E doppo specchiate, specchiate ccà :  
Vide che tronola Marzo te spara ?  
Vide Dommineco che te sa fà ?  
Tè chisto piecoro ; chisto a ddoie mamme  
Mpuglia lo ficero nfì a mmo allattà :  
Nè se pò reiere ncopp' à le ggamme,  
Pocca no quinnece iuorne avarrà.  
Mo nc' è pe Nnapole no sciala sciala ;  
Riale a ttommola vide assommà :  
Ma chi no piecoro po te riala ,  
Sa che se dicere, sa che se fà.  
A terribbilio li iettature  
Nfrotta ronneano pe la cetà :  
Nè stanno, canchero ! manco secure  
Chille che nasceno ssi iuorne ccà.  
Peo de li frugole ciert' uocchie sghizzano  
E lo frusciabbele sanno fruscià :  
Addò se votano , addò s' appizzano  
Porzà le ccercole fanno seccà.

Ma t'è sto piccoro le belle ccorna  
Che co na razia stanno a spontà,  
Sò lo remmedio che tutte scornà  
Ssi male-fercole de la cetà.  
Chisso remmedio, ch'è traseticcio  
Ntra muro-e stantaro tu puo' mpostà :  
Chisso te libbera da mpeca, o mpiccio,  
Che ghiettatorio te pò scàsà.  
Co sto mmencibbele scuto fatato  
Tu mbè puo' dicere co beretà :  
Io so lo passaro, che n'è sparato,  
Nfi che a sso tittolo pò sotta stà.

### LO CARCERIERE CARCERATO

Oh mannaggia ! Sì, mannaggia !  
Io me sento già l'arraggia  
Da le pponte de li piede.  
Che soccede, che soccede !  
Stammatina appena asciuto  
Da la casa m'ha smestuto  
No vastaso : lo bastone  
Aggio auzato, no guaglione

Lesto cchiù de no tentillo  
M' ha rrobato lo vorzillo,  
E ppo nzieme co l' ammico  
È scomparzo pe no vico.  
Po so ghiuto Mmicaria,  
Pe ssapè na causa mia  
Si spontava, o no spontava.  
Lo paglietta m' aspettava,  
E mm' ha ditto a nnote chiare:  
Aie già perze li denare,  
Che mprestaste a Don Ramunno,  
Pocca chillo chiatto e ttunno  
Ha lo debbeto negato;  
E ssi stato connannato  
Co sentenza ntra no mese  
A pavà porzì le spese.  
Io qua statola rommaso,  
Me volea scioscià lo naso;  
Ma che buò? le mmoccatora  
So scomparze a la mmalora  
Da la sacca; e mmanco trovo  
Neuoll' a mme l' alluorgio nuovo.  
Pe ppiglià vaco rapè,  
E la scatola no nc' è:

Fuorze a quacche tabbaccuso  
L'è ppiaciuta, e n' ha fatt' uso.  
Doppo chisso precepizio,  
Cuoto cuoto qua novizio  
Che cammina pe la via,  
Me ne torno ncasa mia.  
Mente sto mmiez' a l' antrone,  
Nnant' a mme no lazzarone,  
Salutannome, me scippa  
Lo cappiello, e sse l' allippa.  
Traso nsala, e lo criato  
Trovo tutto ndiavolato,  
Pocc' avea no monnezzaro  
Arrobbato no cucchiaro.  
Tanno allucco : dalle dalle,  
Sciorte, a ppiette de cavalle !  
Vaco appena pe spogliarme,  
Pe mmagnare, e ppe ccorcarme,  
E rrecevo sso viglietto,  
Che mme porta no giacchetto.  
*Caro mio signor Barone,*  
*Di lagnarmi ho ben ragione,*  
*Che nel vostro canzoniere*  
*Voi rubaste un mio pensiero.*

*Delle Muse un vecchio figlio  
Vuol rubar ? mi maraviglio.  
D' un tal furto offeso io sono ,  
Ma vi accordo il mio perdono ,  
Purchè voi non più rubiate  
I pensieri di quel vate ,  
Che con tutta l' amistà  
Sottoscrive. P. A.*

Oh mmalora ! Pure chesso  
De sentì me spetta appriesso ?  
E sse crede , o non se crede  
Tutto zo che mme soccede ?

#### SILENZIO ATERNO

M' allecordo quann' era tantillo ,  
Si voleva ddì meza parola ,  
Mine deceva la ggente : Strunzillo ,  
Statte zitto , va penza a ffà scola ,  
Va pazzea , va le nnuce a ttozzà.  
Strappatiello , parlare volea ,  
Ed agnuno decea : Don Cocozza ,  
Statte zitto , Toletto passea ,  
Va ntriato , va trotta ncarrozza ,  
Penza schitto a bballare , e ghiocà.



Mo che ghianco se fa lo caruso ;  
Potria fuorze parlà ? Non sia maie !  
Cchiù li vecchie sentì no nc' è l' uso ;  
Ch' ànno a ddì chisse mucchie de guaie ?  
Ca penzassero schitto a crepà.  
Lengua mia , tu a lo munno sì nnata ,  
Pe ffà che ? pe tte mettere arreto :  
Quanno donca sì a zo connannata ,  
Quann' è stiso sso bello decreto ,  
Statte zitto , nè cchiù pepetà.

A R I A

*Da cantarse ncopp' a la Zampogna, niente lo  
zampognaro fa abballare li pastorielle co lo  
denucchio.*

Llero llero, - è cchiù che bero  
Ch' è ffalluta la bontà ,  
E a zeffunno - nchisto munno  
Nce so mpeche, e ffauzetà.  
Na nennella - bella bella  
Tanta squase te sa fà ;  
E tte dice: - so felice  
Sì te pozzo nguadià.

Mente Ammore - chillo core  
Pe tte schitto fa squaglià ,  
Llero llero , - è cchiù che bero  
Che te vole scortecà.  
No paglietta - ch'è porpetta  
Te carfetta a llitecà :  
E bedere - co piacere  
La vettoria già te fa.  
Gira , vota , - e ppo revota  
Mente spiere guadagnà ,  
Llero llero , - è cchiù che bero  
Che le spese aie da pavà.  
No ngegnerio - ntapechiero ,  
Pe tte fare fravecà ,  
Te prommette - dint'a n'ette  
Che na casa sape auzà :  
Tu lo ntienne ; - e mmente spienne ,  
Spiere a Chiunzo d'arrevà :  
Llero llero , - è cchiù che bero  
Che ncammisa aie da restà.  
No mbrogliione - chiacchiarone  
Vo , qua miedeco , curà ;  
E a la ggente - vo co niente  
Ogne male fà passà.

Co ssa cura - de mpostura  
Cride tu de te sanà?  
Llero llero; - è cchiù che bero  
Che t'attocca a requià.  
No mercante - trastulante  
A rrentennere te dà  
Mare e munte; - e a ffà li cunte  
Robba vecchia aie d'accattà.  
Tu la vide, - e già te cride  
De sapè niozià.  
Llero llero, - è cchiù che bero  
Che t'aie fatto nfenocchià.  
A zeffunno - nchisto munno  
Nce so mpeche, e ffauzetà:  
Llero llero, - è cchiù che bero  
Ch'è falluta la bontà.

### LO MMITO A TTAVOLA.

Maie cchiù a la casa d'autre  
Magnare; arrassosia!  
Sempe a la casa mia  
Voglio cancarìa.

E ssi po so mmitato ,  
*Amici, quid agendum ?*  
Dico che sto mpignato ,  
Ma no a lo Banco , sa.

Aiere me mmitaie  
A ttavola n' usciere :  
Fuie proprio no piacere ,  
Piacere da crepà.

Io voglio la *minuta*  
De sso banchetto fare ;  
E ppo la ricevuta  
Apollo me farrà.

Na zuppa a *breve termene*  
Nce fuie de maccarune ,  
Che manco duie picciune  
Poteva sazià :

E ppo na menestella  
Saporetella a sale ,  
E d'acqua grassolella ,  
Da fare vommecà.

Venette lo *sequestro*  
A lo bollito , pocca  
Parea de tenè mmocca  
No marmo a mmazzecà.

Ascette po l'arrusto,  
E mme ntimaie l'*arresto* :  
Vacchetta pareva iusto ,  
Non vacca a lo taglià.

Na *causa ncontumacia*  
Riunita era lo pane,  
Fatto da doie semmane ,  
Buono pe te sciaccà.

Na pizza de recotta  
Tenea lo *preventivo* ,  
Ca essenno già corrotta ,  
Me volea fà sfrattà.

Cchiù de na meza fuorze  
De vino acetosiello  
Dint' a no perettiello  
Nce fice consolà.

Lo caso quaglio ascette ,  
E mme pareva l'*udienza* :  
Li vierme qua pagliette  
Stevano a litecà.

No peiattiello rutto  
Co n' accio , e no cardone  
Fuie la *concrusione*  
De sso banchetto ccà.

Da tavola m'auzaie  
Muorto de famma, e arraggia,  
Iuranno a cchisse guaie  
Maie cchiù de me trovà.

### LO NUOVO MASTO DE SCOLA.

Tu fegliulo, tu fegliola,  
Lo buon-tuono vuoie mparà?  
Vienetenne a cchesta scola,  
Ca te faccio addottorà.  
Senza capo e ssenza coda  
Tanta cose aie da senti;  
Ma po penza ca la Moda  
Lo commanna, e bò accossi.  
A triato, quann'è gala,  
Lo parchette aie d'affittà,  
E le ddeppie eo la pala  
Pe bestirte aie da iettà.  
Si te mancano denare,  
Lo remmedio sa qual'è?  
No nce mancano usurare,  
Pe tte fare comparè.

Si te mmitano a no ballo,  
Comm' arillo aie da zompà;  
E non cauce de cavallo,  
Ma de ciuccio aie da menà.  
Pe bballare, ogne perzona  
Veste legge ha da portà:  
La decenza è bella e bona,  
Ma no stesse a nce zucà.  
Na signora n' è baiassa,  
Che a la casa ave a ppenzà:  
Benedetta si se spassa;  
Tanno mosta nobertà.  
A li feode che tenite  
Nc'è l' agente? e cchillo fa.  
Pe ddefennere le llite  
Lo paglietta no nce sta?  
Li cavalle, e le ecarrozze  
Da Ngretterra hann' a benì:  
Ccà so cape de cocozze,  
E no ssanno che se ddì.  
Quanno po ve mmaretate,  
De costume, e de bontà  
Pe ppiatà non v' occupate,  
Ca so bere antichetà.

A la nasceta, e rrecchizze  
Mo se penza, e a nniente cchiù :  
Cheste songo le bellizze ,  
Li costumme, e le bertù.  
Vasta ccà. Sta lezione  
È pe buie lo Be-a-bà :  
Ma si avite ntenzione  
Addavere de mparà ;  
Ccà stongh'io de tutto core  
Lo buon-tuono a ve nzegnà ;  
Avastannome l'annore  
Ssi scolare de caccià.



POVERA ASTRONOMIA

*Ntra Mineco lo criato, e Ntuono lo ferraro.*

*M.* Ntuono mio, ccà no nc'è tiempo da perdere.

*N.* Che tt'è socciesso?

*M.* Tu che sì gabbolista, canosciarraie buono l'astronomia?

*N.* Io, ma te lo dico a quatt'uocchie, so tentato de stamparne no trattatiello.

*M.* Eddonca sienteme buono. Io da tre ghiuorne sto a patrone co no professore d'astronomia; e lo sensale, che me mettette a sservirlo e m'avisaie ca chillo quanno chiacchiarea sulo dà li nummere a la bonafficiata.

*N.* L'affare accommenza a ffarse serio. Attiento mo a ccontarme lo fraceto.

*M.* Aiere sera lo patrone, passianno dint'a la cammara soia, decette: mo trase Dicembre, e a li 21 nc'è lo sole-stiteco.

*N.* Tu non sentiste buono: comme decette?

*M.* Nc'è lo sole-stiteco.

*N.* Ma lo sole non tene tafanario, comme mma-lora pò essere stiteco? E ppo, iusto a li 21

aveva a soccedere ssa stitechezza? propeto  
nehillo iuorno s'aveva ad abbottà de patate,  
o de castagne?

M. Si isso decette na ciucciaria, io te ne dico  
doie; ma chist'è lo fatto.

N. Io sto fora de li panne; e mme sto mpa-  
ranno cose, che non sapeva ancora. Iusto  
iusto m'aggio accattata la *Nova Smorfia*, e  
mo vedimmo de cacciarne lo costrutto. (*Leg-  
genno*) Sole.... Sole.... Sole.... Sta a 1, e  
nnotammolo. Appriesso. *Stiteco stì, Stiteco  
stì 20*. Ma ccà se parla de l'ommo stiteco:  
mo nce arremmedio io. Lo sole è quatto vote  
cchiù peccerillo de l'ommo, e nce pare co  
ll'uocchie; ergo si l'ommo stiteco fa 20, lo  
sole stiteco fa 5. E nfi a mmo avimmo com-  
binato n'ambo, 1. e 5..... Anze, avenno lo  
patrone tuo nnommenato Dicembre ch'è l'ur-  
temo mese de l'anno, mettimmonce 12, e  
la giornata 21 e stammo a lo quaterno. Ave  
ditto nient'autro?

M. Gnorsì: deceva che nc'erano aggrisse de  
sole, e de luna, vesibbele, e nvesibbele.

N. *Aggrisse*, zoè *appicceche*, 82: la luna sta

a 6. Fuorze facenno ss'aggrisse starranno mbriache lo sole, e la luna: donca 14. E stammo a sette nummere, ch'avriano ascì tutte sette 1. 5. 6. 12. 14. 21. 82.

*M.* Po se faceva lo cunto quann'era la patta, o la parapatta.

*N.* Non sentiste buono: avette a ddi parapatta e pace. La *pace* sta a 17: *parapatta.... parapatta....* no nce sta dint' a la Smorfia; , mmo mettimmo 71 ch'è lo contraposto de 17. Appriesso.

*M.* Appriesso, comm' avesse nnommenato no numero d' oro.

*N.* Avesse ditto na moneta d' oro?

*M.* Non signore, numero d' oro.

*N.* *Oro fino* sta a 82, e *oro fauzo* a 69: notammole tutte duie.

*M.* Mo appizza le rrecchie, e ssienteme buono. Deceva ntra isso, e isso: pe cchesso lo sole stà fremmato, e la terra vota.

*N.* Ccà volette dà certamente li nummere, pocca nuie vedimmo che lo sole cammina, e nnuie stammo fremmate. Io mettarria lo *strummolo che bota* 12. e già l'avimmo no-  
\*

tato; e *ssentinella morta* 72, pocca sta sempe a uno pizzo. E *ssimmo* arrevate a unnece nummere. Se stette zitto a mmalora sso patrone tuio, o *ssecotaie* a scacatià?

M. Mbrosoliava ntra li diente *ciclo*.

N. Chessa sarrà parola greca, ma no ssaccio si vo dicere *cicero*, o *cicolo*: mo li mettimmo tutte duie. *Cicere*, zoè *ceci* 10, e *ccicoli* 65.

M. Po le sentiette nnommenà nnuzione.

N. Nnuzione? Pigliammo *nuzzolo*... No nce sta: *nozzolo*... manco nce stà. È na vera Smorfia de taverna. Comme lo *nuzzolo* cchiù gruosso è cchillo de *percuoco*, pigliammo *percuoco* 8. Va buono?

M. Ebbiva Ntuono mio! va propeto a cciammiello. Si non guadagnammo a ssa botta, non guadagnammo cchiù. Po se faceva lo cunto quanno lo sole steva ncanchero.

N. Quanno sta senza denare pèvo de me. *Can- chero*... *Canchero*.... è sia canchero mpasticcio., *Canchero* 31.

M. E le sentiette ddì quinozio.

N. Lo quinozio è quanno uno se crede de guadagnà assai ncopp'a na specolazione, e nce

perde frutto e ccapitale. Pigliammo *nioziante* 27. e *ffalluto* 62. È ffenuto?

*M.* A ll'urtemo ha ditto Mercurio.

*N.* Avesse ditto a llengua toska *Mercurio dolce*?

*M.* Tu che doce, e amaro? Me sò alleccordato meglio: ha ditto Mercurio co li satellete.

*N.* Mo t'aggio afferrato: chisso t'ha voluto mmocà li nummere co lo cucchiariello. Mercurio è lo nummo de li mariuole: lo mariuolo fa 79. e li compagne, o sia li satellete.... consurtammo la Smorfia. *Satelleto*, *satelleto uno* 43. *Satellete assaie* 47. Donca 47 e 79.

*M.* Levame na curlosetà: a quanta nummere simmo arrevate?

*N.* A dicinnove nummere; pocca lo 12 e lo 21 songo raddoppiate, ca si no, sarriano vintuno nummarielle certe.

*M.* E quanto nce potriamo mettere?

*N.* Smorfia me chiammo. Lo volimmo fà a vi-gliettone ad ambo, e tterno?

*M.* E già, pe non restarce corrive.

*N.* A dicinnove nummere pe bencere l'ambo de seie carrine nce vonno quarantanove rana, e nove calle, e pe lo terno d'unnece du-

cate, e binticinco rana nce vonno vintiquattro carrine, doie rana, e tre calle.

*M.* Addavero?

*N.* Accossi ascessero tutte li dicinnove nummere. Chisto è lo cunto. Dicinnove nummere fanno ciènte sittantuno ambe, e nnoveciente sissantanove terne.

*M.* E ttu comme mmalora sì ghiuto a ccaccià tanta nummere?

*N.* Te la piglie co mme? pigliatella co lo patrone tuio, che se chiacchiarea na mascella.

*M.* E mmo comme facimmo?

*N.* Lo facimmo mbruodo, ch'avasta a ttutte. Io derria mpignarte la sciammeria, e mmietence ncoppa ssi vintinove carrine, e doie rana.

*M.* La sciammeria mia non ha vintinove rana, chi me la mpigna 'pe bintinove carrine?

*N.* E ttu fa accossì. Co la lecenzia de lo patrone mpignate la livrea.

*M.* Pò essere ca lo patrone, sentenno ssa lecenzia che boglio, me dà la lecenzia che non boglio, e mme ne manna da lo servizio suio, restannome a passià nnante a la Galitta co l'ate settepanelle a spasso.

*N.* E cche t'aggio a ffà?

*M.* Famme lo ristretto.

*N.* Non pò essere. Si ne levo lo sole, e la luna, s'affenneno, e non me fanno cchiù luce, quann' io l'asservo co lo cannocchiale acromateco-ngrese. L'Aggrisse nce vonno a fiorza. Mercurio, vedennose scartato, me pò spoglià la casa.....

*M.* Passarrisse ssi quatto guaie pe mme? Non sia pe dditto. Quanno sentarraggio da lo patrone quarche autro trascurzo cchiù curto, tornarraggio ccà.

*N.* Siervete a gusto tuio: avasta mperò che sia trascurzo d'astronomia, ca chella è la materia mia. Io sto facenno lo ferraro pe no stà nn'ozio; ma la passione mia è cchella.

*M.* Statte buono: te rengrazio, e tte cerco scusa de lo tiempo, che t'aggio fatto perdere.

*N.* No ne'è de cche. A summo a summo dint'a sta mez'ora avarria potuto scovrì tre, o quattro comete nn'aria.

*M.* Aspetta Settembre.

*N.* E ppecchè?

*M.* Ca tanno li guagliune menano le ccomete nn'aria.





Dite, *mon pere*, in grazia ,  
Se questa lente sia  
Del verde *pulce-d'-India*.

M. Povera capo mia!  
Tu primma cchiù de n' aquela  
La vista avive fina;  
E mmo non bide Proceta?  
Fuie l'aria pariggina.

P. Oibò, si finge miope  
A danza, a gioco, a *table*  
Un *petimetre* amabile,  
Un vero *fescionable*.

M. Che mmetro de deiavolo!  
Che ffescene e cchiaccune !.....  
E cchelle tre che sbrenneno  
Prete de carrafune?

P. Sigilli son, che diedemi  
*Madamosella Sista*,  
Figlia di *Monsù Placido*  
*Trattore*, ed *obergista*.

O pegni d'amicizia,  
Ricordi *com'è fò*,  
Siatemi indivisibili  
Compagni nel *tombò*!

*M.* Peppì, parlammo a ntennerce :

Te fusse nnammorato  
Nfranza, e la matremmonio  
Avisse combinato ?

*P.* Fremete, o nobil' anime

D'estinti bontonisti,  
D'un uom del vecchio conio  
A tali accenti tristi.

L'amor, l'amore ammettesi ;

E in ciò me stesso io lodo :

Ma il matrimonio sembrami

Degli ammalati il brodo.

Gli antichi *s' arranciavano*

Con passo tal, *sor* padre :

Or son l'idee del secolo

Tonde non più, ma quadre.

*M.* Vattenne, o mo a lo sidece

T'assesto no caucillo :

Vide ca parle a schiovère,

Peo de no peccerillo ?

*P.* Ma voi l' antiche massime

Siete a sentire avvezzo.

*M.* Te venga na pepitola,

Piezzo de catapiezzo !

P. Ora il buon-tuon...

M. Tè, sientete

Chisto vernacchio: è buono?

È ffatto ntutta regola,

Secunno lo buon-tuono?

### LE RAGGIUNE

*De lo mercante mbroglione.*

Quarche deiavolo, previta, mia,

Co mmico proprio se vo spassà.

Chi non sa ntennerse de mercanzia,

De sta materia vo raggionà.

No cierto chiochiaro de potecaro

Me vene a ddicere... nnevina che?

Ca nce sta scrupolo (de recottaro)

A ddà pe quinnece zo che ha tre.

Aggio a rrefonnere donca poteca,

Vastase, giuvene, doana?.... Ne?

Uommene, e ffemmene, chi maie ve preca

De venì a spennere iusto da me?

N' altro redicolo dice che arrobba,

Comme a 'la prubbeca strata se fa,

Chi co le cchiacchiere sape la robba

Ngottata e fraceta pe bona dà.

Ncopp'a lo stommeco mo me la mecco ,  
Comm'a no barzamo che fa sanà :  
O pe le ccammere la spanno e azzecco,  
Qua cartapecora de nobertà.

Si l'oro fauzo non daie pe ffino ,  
Vennenno n' abeto de gala , può  
Fuorze abbuscarete quarche carrino?  
Pe llonga pratteca saccio ca no.

Quanno tu abbilete le ffemmenelle  
Che hanno a bennere pe la cetà ,  
Si non faie rennere le credenzelle  
Cchiù de lo duppio , comme se fa?

Si fa le ccarole quarche castoro ,  
Tu pe ccoscienza lo puo' iettà?  
L'Abbreie renacciano co l'aco d'oro;  
E cchi diaschece lo bo appurà?

Signure ntontare , potite ntennere  
Ste belle mmasseme , ste beretà?  
Lassate vennere a cchi sa vennere ,  
Nè lo zucabbele state a zucà.

SCENA DOMESTICA

*D. Antonio, e D. Ramunno.*

*A.* (Oh mmalora, chi trase! Don Ramunno,  
Lo primmo chiacchiarone de lo munno.)

*R.* A lo mio pregiatissimo, ornatissimo,  
Gratissemo, e amatissemo  
Signore Don Antonio....

*A.* Chesta pare  
Sopraccarta de lettera.

*R.* Presento  
Salute co la pala.

*A.* Arrassòsia!

*R.* Tengo na cimma de scerocco, e bengo  
A sfogare co ttico.

*A.* (Oh precepizio!)

*R.* Già saie ch'io so prudente,  
Che parlo poco, ma conchiudo....

*A.* Niente.

*R.* Fora pàzzie: te voglio  
Contà n'affare mio da capo a ffunno.  
Io me chiammo Ramunno Stonatore,  
Tengo trent'anne, quatto mise, e ghiuorne,  
Mpiagato a la Doana....

- A.* Mio patrone,  
Io non so no commesso  
Che t'aggio a ffà la filiazione.
- R.* È pe ddicere tutto filo filo.  
Sto senza patre, mamma, frate, e ssore,  
*Ergo* faccio l'ammore.
- A.* A cche proposeto?
- R.* Pe nzorarme; me ntienne?
- A.* Conta appriesso.
- R.* A li seie de Settembre, anno corrente,  
Sott'a l'*una* de Franza io passiaa  
Pe Toletto; vediette  
Lo Vapore venì; co cinco rana  
Me mpizzo, anze me nzardo  
Co dec' altre perzune, e baco a scennere  
A la Villa Riale. A la fontana  
Ncontro... Chi ncontro ne?
- A.* Quarche mammone?
- R.* Gnernò! Donna Rosina Battistrata,  
Figlia de Don Frabbizio,  
E Donna Fortunata, na fegliola  
Bella essa sola; d'anne diciotto,  
Auta, ianca, capille  
Castagne, uocchio ceryone....

A. E cchesta è n'ata filiazione.

R. Non me nterrompe, canchero!

Tu non me faie parlà.

A. Tu non me faie

Manco sciatà.

R. Proprio co ll' uocchie mieie

Io la vediette.

A. E ffuorze la volive

Vedè co ll' uocchie de lo tierzo?

R. Tiene

Lo carro a quarche scesa: va repara

Lo fuoco a na stallerà....

A. (Chisto pare

No sparatorio, bù)

R. Subbeto subbeto

Pigliaie paiese. Dòn Frabbizio steva

De casa a la Nfrascata,

Nummero cinco, a mano ritta, rente

Lo potecaro, ed era

Mpiagato a lo tabbacco.

A. (Bù! bù! bù!)

R. Le mannaie l' addimmanna pe no cierto

Micco Pacicco a ll' ore dicisette

De li nove Settembre, de dommeneca,

Bella iornata.

A. (Tricche! tracche!)

R. Chillo

(Vi che messere?)

A. (E ttu cchiù d'isso.)

R. Appena

Lo nomme mio sentette, reprecaie:

Io dò figliama a cchillo palloniero

Che zuca miezo munno?

A. (Beneditto!)

R. A ssa risposta schitto

Io m'allummaie de capo. Vaco, corro,

Appuro, ntenno.

A. (Tricche! tracche! bù!)

R. La fegliola me vole; e preca, e ddice,

E pparla, e mpegna, e nfraceta

Mamma, sore, vavone, caienate,

Consoprine; pariente, ammice....

A. (Bomma!)

R. Ma Don Frabbizio nsomma

Cchiù tuosto de pepierno, non se chiega,

Nè se rompe, o se vota.

A. (Sia beneditto la seconna vota!)

R. Io stonaie tutto Napole....

A. Lo credo,

Senza che ghiure....



*R.* Ddamme, cavaliere,  
Conte, marchise, prencepe, barune,  
E mmiedece, e ppagliette, e ssecretarie....

*A.* E fferrare, e scarpare, e ppotecare,  
E ccaccimole, e ssartinbanche, ezzetera....  
E cche mmalora! s'è spilata Patria.

*R.* Eh zitto! famme ddì meza parola,  
Na parolella sola.

*A.* Lo piello che t'afferra!

Tu mo me faie schiaffà de facce nterra.

*R.* Quanno non buoie sentirme, me ne vaco,  
E tte chianto qua ccavolo.

*A.* E battenne a ddeiavolo.

*R.* Lo mmeglio  
Non te voglio contà.

*A.* Faie buono.

*R.* Resta  
Corrivo comm'a scigna. Non te voglio  
Fenì la storia....

*A.* Te rengrazio.

*R.* Manco  
Si me daie seie carrine.

*A.* Te ne dongo  
Sette, vasta che squaglie.

R. (Pigliannose lo cappiello) Statte buono.

A. A rrevederce (non sia maie!)

R. (*Ascenno fore tutto mpestato*) N'ammico  
Non fa manco parlarme? Non fa dirme  
No fatto ndoie parole?

A. Cientomilia

N' aie dette, e stive a be-a-bà.

R. (*Da lo ballaturo*) No sfuoco

Nnozente, nnozentissimo non trova

Piatà, misericordia,

Soccurzo, aiuto da n'ammico? Canchero!

Io ccà non torno cchiù.

A. Bene provisò.

R. (*Scennenno le scale*)

Io non ve saglio cchiù, scale mmardette,

De l'ex-ammico mio si Don Antonio,

Che qua bero demmonio

Co le ccorna e la coda, è no schiattuso,

Nè fa parlà nesciuno. Porcaria!

Porcaria fetentissema! Ma pure....

(*Dala stratavedenno D. Antonio affacciato*)

A rrevederce a l'ato munno, ammico,

Che buò parlà tu sulo, e mmaie non faie

Rapì la vocca a nnesciun'autro. Addio.

Ma mperò ccà stongh'io  
Pe sprubbecà sso vizio tuo pe ttutto.  
Leggeraie li Giornale  
Letterarie, politece, analitece,  
-Paiesane, e frostiere....

(*D. Antonio le nserra lo barcone nfacce*).

Se n'è trasuto? Io tornarria mo ncoppa,  
Pe ddirle quatto chiacchiere. Che faccio?  
Non boglio darle tanto annore. Vaco  
Mo proprio a sta pedata  
Ncasa de n'autro ammico, pe mme fare  
No trascurzetto a sfizio mio. Deceva  
Lo scrivano, che stea fora Melito:  
*La parola è del Ciel dono gradito.*

# TRASCURZO NTRA NO BARONE

*Poveta vecchio, e D. Ciccillo,  
poveta fegliulo.*

C. Sì Barò, tu che faie?

M.B. Sto componenno

La Nferta.

C. Me potrisse

Fà no piacere?

*M.B.* Te ne faccio mille.

*C.* Sta pe sposà n'ammico mio : mmitato  
Pe sapato sò stato  
A ppiglià ncasa soia lo zuca-zuca :  
E ppe levarme l'obbrecazione,  
Aggio nchiaccate ccà doie canzonette  
A llengua nosta, pe le ffà cchiù belle.  
Mo te le llegho; e cchella  
Che te pare la meglio, io stamparraggio,  
Pe despenzarla a li mmitate.

*M.B.* Liegge.

*C.* (Legge) *Ammore mariuolo,*

*M.B.* Mmalora ! l'aie pigliato pe Rinardo.

*C.* E ppuoie negà che Ammore  
Non arrobba li core ?

*M.B.* E ppuoie negare  
Che Rinardo n'arrobba le ggalline ?

*C.* No mme nterrompe ; siente  
Primmo tutto lo senzo.

*M.B.* (De limone.)

*C.* (Legge) *Ammore mariuolo,*  
*Aie da piglià no vuole*  
*Comm'a no rosignuolo ;*  
*Escinne... Addò?... Alo Muolo.*

*M.B* Aggio ditto buon'io ch'era Rinardo,  
Che ba a lo Muolo pe ssentì cantare  
Le ccorna soie.

*C.* Ma si lo matremmonio  
Se fa rente a lo Muolo, e ffaccefronte  
A lo Castiello-nuovo.

*M.B* Liegge appriesso.

*C. (Legge)* Vecino a lo Castiello  
Nce trovarraie no bello  
Zitolo gioveniello.,...

*M.B* Zitolo! Miette zito.

*C.* E ppo nce manca  
Na sillapa.

*M.B* Raggione commincente.

*C. (Legge)* Vecino a lo Castiello  
Nce trovarraie no bello  
Zitolo gioveniello.  
Levate lo cappiello.

*M.B* E Ammore porta lo cappiello? Armanco  
Lo portasse a tre pizze, e non già tunno,  
Pe ffà gala a sso zito.

*C.* Tu coffie.

*M.B* Cicci, senza cchiù perdere lo sciato,  
Stampa chell'autra canzonetta.

*C.* Chisto

È ceconsiglio a barrata de cecato.

Senza primmo sentirla.

*M.B.* Non pò esse

Maie cchiù pevo de chessa.

*C.* Tu che dice ?

*M.B.* Zo che proprio me nfroceca lo core.

*C.* E ssa Nferta che faie

Sarrà meglio de chesta canzonetta?

*M.B.* Fuorze sì, fuorze no.

*C.* Po lo bedimmo

*M.B.* Mo faccio na terata de mammoria,

Che ba no Banco. Dinto

A la Nferta nce mpizzo

Ssi vierze tuoie co tutto lo trascurzo,

Ch'avimmo fatto.

*C.* Beneditto tutto !

Io da mo me ncaparro

Pe cciente copie. Tanno

Se vedrà si è ccocozza sto mellone,

O puro è speziaria

De zuccaro ngranito.

*M.B.* Arrassosia !

LO LAMIENTO

*De Titta Passa-guaie.*

Contà le ppene meie  
Voglio a la bona ggente ,  
Non ch'io sperasse niente ,  
Ma schitto pe sfocà.  
Chiste non so li cunte  
De ll'uorche e de le ffate ;  
So heretà specchiate  
Da f'à trasecolà.  
D'ott'anne iea vennenno  
Co ll'autre guaglioncielle  
Lupine salatielle  
A ccagno a ppezze... E cche?  
Nchill'anno le ccartere  
A spasso tutte stevano ;  
E stracce non bolevano  
Sentire, nè bedè.  
Cchiù gruosso, fuie garzone  
De ziamo galessiero :  
Da quale passeggero  
Potte no rano avè?

Pe ghionta de lo ruotolo  
Po li Vapure ascettero ,  
E l'arte mia facettero  
De pisemo cadè.

Tentaie la sciorte mia  
Mmiez' a li schiattamuorte :  
Ma chella fuie la sciorte  
De tutta la cetà.

Quarche becchione affritto ,  
Sì o no, morì soleva ;  
E ad atterrà se ieva  
Pe ppura caretà.

Speranno de campare  
Lo vierno a lo mmacaro ,  
Penzaie lo zoccolaro  
Pe ssi paisè fà.

Che sole stralucete !  
Che strate asciutte e nnette !  
Nfì a Marzo che bolette  
N' ora sghezzechià ?

Stiette co no fornaro ;  
E cchillo ntra li guaie  
Morette , e mme restaie  
Nove iornate a ddà.



Fice lo caccia-vino ;  
E cchillo canteniero  
Non voze sso mestiero  
A munno suio cchiù fà.  
Arte no nc'è, nè parte  
Ch'io pozza fà : la sciorte  
Zucà nfino a la morte  
Qua pittema me vo.  
S'io me mettesse a ffare  
Li cantere, ve dico  
Ca senza chill'ammico  
Se nascerria da mo.

L'ACQUAIUOLO

*E lo lazzaro cotecone.*

**L.** Acquaiuolo mio caro, .  
Io vevere vorria.

**A.** Vive.

**L.** Ma primmo

M' aie a ddicere schietto

Co la coscienza nnante a ll' uocchie, quanta  
Neve tu miette dint' a sso tremmone.

**A.** Quanta cchiù nce ne cape.

**L.** Beneditto !

Tiene la facce de lo buono agurio.

Dimme mo n'ata cosa :

Da quanto tempo proprio

Aie puosto mano a sso tremmone ?

**A.** Fuorze

Da miezo quarto d' ora. Ne ? tu fusse

Scrivano crimmenale ?

**L.** Agge pacienza :

Io voglio spenne li denare mieie,

Ma non ghiettarle nterra. Tu me nzigne

Che cimma de pignato,

E rreto de tremmone è assaie stimmato.

**A.** Chisto è lo vero punto

Che haie tu ascianno.

**L.** Quann'è cchesto, mietteme

Na *piccola*, e nce voglio lo limone

Frisco, gruosso, e de zuco. A qua ciardino

Te sierve ?

**A.** Figlio caro,

Nfettarrisce na nave de pezziente.

Chist'è becchiero d'acqua, o mercanzia

De seta ?

**L.** Tu te nzurfe ; ed io penzanno

Che mo la sete m'obbreca a ccacciare  
No tornese, me sento  
Corrivo comm' a scigna. Va sceglienno  
No becchiero che sia  
Fino de vrito pe ccapè cchiù acqua.  
Quanno a Pasca e Natale  
Na *soleta* me piglio a no Cafè,  
Voglio tazza pesante  
De cafè, non de creta. Aie posta l'acqua?

A. Vi comm'è cchiara!

L. Canchero!

Non tremmà co la manò:  
N'aie fatte ì nterra no cinquanta sghizze.  
Refunne l'acqua; e spriemme lo limone.

A. Ecco ccà.

L. Strigne buono

La tenaglia, ca tiene  
Forte le mmane, e non farranno calle.

A. (Vera pacienza de remito!) Vive.

L. E strigne n'ata vota! fa lo zuco

Nzin' a l'urtemo ascì; te guarda craie!

Resta asciutta la scorza comm' a suvaro.

A. È ffatto: sì contento?

L. Meno male.

( *Se veve nzin'a l'urtema sghizza d'acqua, torna lo becchiero a l'acquaiuolo, e sse mette a ttenemente la scorza de lo limone* ).

A. E quanno cacce la moneta?

L. E quanno

Me daie la robba mia?

A. Qua robba toia?

L. La scorza de limone: fosse cosa

De li muoffe de mammata?

A. ( *Menannole la scorza nfacce* ) Vattenne,  
Puorco avaro nfì a ll'uocchie! me farrisce  
Passà no guaio: non boglio  
Niente; avastà che squaglie.

L. ( *Tutto contento* ) Te rengrazio.

( *Iennosenne* ) Oh che piacere! m'aggio

Lo cannarone refrescato, senza

Spennere niente: no limone nfacce

Fa sparagnarme no tornese? e quanno

Me ne menano n'autro? stò tornese

Sarrà la cena mia. Che bero sfizio,

Quanno sommo a la fine de lo mese

Lo cunto de le spese,

Pe na sciorte a ceiammiello

Sparagnato trovà no tornesiello!

L'AOTORE A DUIE AMMICE POVETE.

Iammoncenne , ammice care ,  
Bello bello , chiano chiano ,  
Iammoncenne mo a sfrattare  
La taverna a Marechiano.

Eh lassammo nn' Alicona  
Co le Muse chillo nummo ,  
Che straccione canta, e ssona,  
Ed è buono pe ffà lummo.

Iette a nfette certe chiante ,  
Che non fanno maie no frutto :  
Vi che piezzo de birbante?  
Vi che sciorta de frabbutto?

È lo lauro bello , e buono ,  
Ma nce vo lo fecatiello.  
Chi penzà pò a canto , e ssuono  
Senz'avè no rafaniello?

E l'Arcadia , e lo Parnaso  
(Già passato è ngiudecato)  
Ponno schitto dà de naso  
A Posilleco ncantato.

E non ghiammo, ammice care,  
Bello bello, chiano chiano,  
E non ghiammo mo a sfrattare  
La taverna a Marechiano?

Non portammo mmidia a Romma  
Pe le bille, e l'uorte antiche,  
Che, si fà ne vuoie la somma,  
Songo cchiù de le fformiche.

Vale tanto Marechiano  
(A ddì mpocchie già me trovo)  
Quanno vale sano sano  
Lo neverzo vecchio, e nnuovo.

Oie dommeneca d'Agusto,  
Ncopp'a cciucce, e ncopp'a ggamme  
Vanno llà pe ddarse gusto  
Frate, sore, figlie, e mmamme.

Fuie Vergilio lo ngegniero  
De ssa nobbele taverna:  
E llà sta' lo fatto vero  
Scritto nfacce a na cesterna.

A cchell'aria isso solea,  
Co scolà lo carrafone,  
Dì le stroppele d'Anea,  
E li cunte de Dedone.

Nè bolennose arrassare

Da sso pizzo, da fegliulo

Ordenaie de s'atterrare

A la Grotta de Pezzulo.

Io non chianto na carota;

Chessa storia se stampaie

Da Don Nufrio Galeota,

Ch'è n' aotore addotto assaie.

Ma lassammo a la mmalora

Sse dottisseme piatanze;

E ppenzammo ch'è già l'ora

D'abbia p' anchì le ppanze.

Eh lassammo nn' Alicona

Co le Muse chillo nummo,

Che straccione canta, e ssona,

Ed è buono pe ffà lummo:

E ppedestre, ammice care,

Bello bello, chiano chiano,

Tutte iagmo mo a sfrattare

La taverna a Marechiano.

LETTERA DE NO STODENTE

*A lo patré.*

*Salve*, gnopatre mio. Quanno argomento  
Da lo *tiempo pretereto*, e *presente*  
Lo *tiempo mio futuro*,  
La capo sbattarria nfacce a no muro:  
Pocca l'introite mieie songo *passive*,  
E l'esite so *attive*.  
La *sostanza*, gnopà, de sto trascurzo  
È d'avere da vuie quarche soccurzo,  
Pe non restà qua *nomme senza verbo*.  
Sta *proposizione* che ve faccio  
È de chelle *assolute*,  
Ngrado *superlativo*;  
Nè soffre *eccezione*;  
E l'*articolo* è proprio *imperativa*.  
Penzate che la *panza*  
No ssoffre *sconcordanza*;  
E *cconjugarse* vole  
Co chillo *verbo edere* ogne ghiuorno,  
Ch'è proprio no taluorno.



Sarrite persuaso ,

Ch'essenno desperato chisto *caso* ,

L'avite a mette *nregola* ,

Scazzanno ogne *accidente* ,

Che *ngrammateca* po non bale niente.

Chesto ch'avite ntiso ,

Chiammare se potria lo *singolare* :

Mo v'attocca a ssentire lo *plurale*.

Lo patrone de casa ,

Essennose addonato

Che pe mme lo *vocabolo* denaro

È *defettivo* , e raro ,

Me vo fà *declinare carcer* , *carceris* ,

*Vocabolo usuale* ,

Che ha forza *personale*.

La lavannara dice

Ch'io pe pavarla vaco a l'*infinito* ;

Ed essa vo lo *tempo*

*Prossemo* , e non *remoto*.

Lo trattore che avanza seie docate ,

Nè potenno da me scippà no rano ,

Fa l'uocchio stuorto peo de no *dittongo*.

Donca co ttanta *dalle*

So arrevato , gnopatre , a l'*ablativo* ;

E pparo proprio n' *H*,  
Comme se sole dicere, *inter litteras*.  
Chesta non è n' *iperbole*,  
E mmanco *vizio de costruzione*.  
Vedite de me fare *coniugare*  
Chillo caro *do, das*; e nn'altro *caso*  
Me ne torno de botta a lo paese,  
A ghiettarme le spese,  
Vennenno a li cchiù commede *scolare*  
Libbre, penne, ostie, carte, e ccalamare.  
*Et tibi manum osculor.*  
*Horatius, filius tuus,*  
*Egenus, inops, miser, et mendicus.*

*De la primma Chelleta d' Anacrionte.*

Io cantà de Carmosina  
Vorria ll'uocchie affatturate ;  
E cche tenta carmosina ,  
Bene inio , sapria mpacchià !  
Io cantà vorria de Rosa  
La faccella aggraziata ,  
Ch'è cchiù fresca de na rosa ,  
Quann'è prossema a sboccià.  
Ma la scema , ma la sorda  
Fa sta cetola ncocciuta ;  
E sse scorda , non s' accorda ,  
Chisse taste a lo toccà.  
Essa è schitto nnammorata  
E de miedece , e ddotture :  
Dalle nnante ssa sonata ,  
E ppo vi che sape fà.  
Nenne , addio : non è pe mmale ,  
Si de vuie non dico n'ette.  
Co spitale , e tribunale  
M'aggio schitto da spassà.

## LO SIECOLO PRESENTE

*Laudato primmo da no Giornale antico, e  
da l'aotore de la Nferta a llengua tosca,  
e mmo a llengua nosta.*

Lo munno cammina a ppasse de giagante.

*L'Arte.* Primma pe ppotè fà la ncisione ncopp' a la ramma se spenneva tiempo e ddenaro; ma mo co na meza iornata, e cco poche carrine la *litografia* te fa li meglio capo-d'opere che buoie. La pittura a *uoglio* costava, e ppuzzava: mo l'*acquarella* arremmedia a sse rotola scarze. Le statole de *marmo* hanno ceduto lo pizzo a li modielle de *jisso*, che songo liegge, e no nc' è pericolo che pozza sfunnà na lamia.

Le fraveche de l'antiche durano ancora: mo se fa no fraveca e sfraveca, e accossì non se perde maie tiempo. Li ngegniere viecchie appoiavano li soffitte ncopp' a le ccolonne: mo mperò se metteno li soffitte sotto, e le ccolonne ncoppa. Chille sciaddeie facevano ogne porta

quant'a no portone : mo se fa quanto nce trase n'ommo , e ha meglio. Chille fravecavano li palazze a li pizze cchiù affollate : nuie , pe starcene mpace , e ppe dormì coiete , li fravecammo mmiezo a le mmassarie. Tanno pe le ccammere nce potive correre co lo spatone , e le bedive tutte stucche , e oro : mo songo acconciolelle , e ccaudolelle , apparate de carta , co li mosaice de creta cotta , le statole de stucco , e li titte de vrito , che te fanno no bello lustro porzì a n' ora de notte.

Co tre leziune mo se mparano le *prospettive* : primma nce consumave la vita.

#### *Calligrafia.*

Co lo *metodo amerecano* ncinco leziune te mpare a ffà no carattere , che pare na stampa de Bodone.

#### *Museca.*

Na vota la museca accompagnava lo canto : mo lo canto appena se sente affocato affocato mmiez' a le gran-casce , a le trommette , e a li cuorne. Na museca de tarantella mosta l'affrizzione ; e na museca mortacina accompagna no balletto de zite. N'alluorgio peccerillo pec-

cerillo te sona la meglio zinfonia de Rossino;  
e puoie viaggià, portanno tutto lo bagaglio mu-  
secale dint' a no bastone.

*Poesia.*

Primma se sudava gnosta pe ccomporre na  
tragedia, nfì da li tiempe de Seneca: mo se  
improvisano da cchiù d' uno. Non se fa cchiù  
no gra poemma, ma tutte simmo povete.

*Mmenziune a ttommola.* Cacciaiemo ncampo  
lo *velocemano*, e lo *velocepede*; e ppo, raf-  
fenanno cchiù la materia, avimmo cacciato l'*om-  
nibus a bapore*, che te ne strascina nzuocolo  
nzuocolo. L'oro, l'argiento, le pperne, le prete  
preziose, e li ddiamante se fanno accossì na-  
turale fauze, ca lo banco non li mpigna cchiù.  
Le strate e li puonte ch'erano de prete vive,  
songo de fierro de liette. S'è aperta na strata  
pe le ccarrozze sott'a no chiummo, e ncoppa  
veleiano li vascielle. La carta de treccalle lo  
fuoglio è ncombustibbele: l'acito, lo vruodo,  
e lo latte se portano mporva dint' a na carto-  
scella: le ppatate, le ccarote, e le ccastagne so  
addeventate zuccotte: da la paglia se fa la fa-  
rina; e sse tesse la radeca de la marva, e la

mazzarella de la fava. Na vota co le stracce de tela se faceva la carta; mo la tela de cammise se fa co la carta. La carne fraceta, e l'acqua fetente tornano a essere bone. Se fanno li matarazze ceniere ceniere non cchiù co la lana de Tunese, ma co lo viento, e oco l'acqua. Li surece filano dint' a la casa de no cierto *Howart*. Li pulece tirano l'acqua co no secchietello comm'a li sguattere de cucina. Se pesa esatto nfì a no capillo co le balanze mariole: e sse fanno addormì l'ape, pe ppotè piglià la cera, e lo mele co tutto lo commedo.

*Semmena*. Primma nc' era sempe paura de carestia, e de famma: nuie nce ne rerimmo. Li bruche, la grannenata, e li ssurece, e le ppapare se ponno spassà comme vonno: lo magnà nuosto non ave abbesuogno nè de sole, nè d'acqua, pocca sta sotto terra, e ppò sazià co poca spesa l'uommene, e le bestie; e ppò addeventà acquavita, farina, e ccaso cuotto co l'uoglio; e le scorze serveno pe l'legna. Chesta è la *patata*.

*Ciardine*. Le bille noste teneno le pparme de l'Africa, li suorve de lo Canadà, le casta-

gne de l'Innie, le mmagnolie de lo Mesciasèbè, li giasommine de l'Arabia, li cetrancolille de la Cina, le nnanasse de lo Brasile, e na frotta de chiante addorose de tutte li cantune de la zona torreda.

N' aratro a bavoire fa li surche a hinte a hinte. Se fa crescere na chianta ntre ghiuorne. Se fanno conservà lo grano, e li frutte pe no siecolo e mmiezo. Se tornano li colure frische a li sciure, e a le ffoglie; e non se penza cchiù nè a stasciune, nè a grade de latetudene.

*Viagge.* Se gira lo munno pe ppassatiempo dint' a n' anno: se va a vevere na botteglia a lo Capo de Bona Speranza, e sse torna ntre settimane a la casarella propria, senza viento farevole. Lo *Vapore* penza a tutto.

Pe ssapè le nnotizie de li regne cchiù lontane senza perdere tiempo, e ssenza schiattà li cavalle de posta, nce sta lo *Telegrafo*.

*Medicina.* Pò nformarse Ippocrate. Mo se dice *Similia similibus curantur*. Na milionesema porzioncella *omiopateca* te fa stà buono, e te ngrassa: e hommecanno ll' uocchie, e ccaccianno le stentina, non stajè cchiù soggetto a mmiedece.



*Trascurzo.* Parlarraie a cciammIELLO nn'ogne lengua, porzì nchella de puorco, nquinnece iuorne. Li guagliune smammate ponno fà da maste a cchille che zucano ancora, co li metode de Monzù Lancasto, e de Monzù Jacotone.

*Lo gusto goteca* da le fraveche è ppassato a le screttture, ed è canosciuto pe lo vero figlio legittemo è nnaturale de la Talia : ed è accossì puro, che tutte l'ausano, e nnesciuno lo ntenne.

*Stampa.* Li libbre antiche a stiento tenevano no frontespizio affritto affritto : li nuoste ne teneno nfì a tre a carattere de scatola. La stampa *stereotepa* è na bella mmaraveglia : li carattere de *sanpareglia* te fanno na libbraja sana co poche fuoglie de carta : e ttu accommienze a leiere n'opera de chesse co ll'uocchie tuoie, e la finisce co ll'uocchie che te dà l'acchiararo.

*Lo tiempo.* La preziosetà de lo tiempo è arredotta na mercanzia. Li nioziantte fanno le ccambialette co na zifra : le llettere se copiano co la *stenografia* : l'arfabeto è cchiù curto, e le llettere doppie se ne so ghiute a mmalora, e chelle *aspirate* se cagnano co n'accento.

No truocchio stampa mille fuoglie l'ora: e na machena caccia carta nzine fine notte e ghiuorno. No zeffunno d'autre machene semoveno da pe lloro, e nce fanno sparagnà tiempo, e braccja.

Li pallune *areostatete* chjne de vapore (vera mpresa de li tiempe corrente) volano cchiù liegge de l'aucielle: e lo stisso vapore fa pori cauzette, guante de castoro, tele, cappielle, rommanze-storice, storie-rommanteche, e mmammorie de tutte sciorte, comm'a stracquine da tutte frutte.

*Cucina.* La moda, lo buon-tuono, la miuseca, ec. songo li sciure de lo siecolo, ma la bona tavola è lo frutto. La Ngretterra è celebre pe lo *rosbiff*, La Talia pe li *maccarune*, la Germania pe la *zuppa a la birra*, la Moscovia pe la *Carlotta*, la Spagna pe l'*ollaporeda*: ma tutte sse ccose so zero nfacce a li cape d'opere de la cucina franzese. Comme se canosce n'ommo da l'aziune, accossì mo se canosce no cuoco da le ssarze, e no repostiero da li stracquine caude, e da lo café ielato.

*Commercio.* Prinmo se nioziava codenare,

robbe, e ccarte: mo avastano le pparole schitto. Se ioca a le *scriziune*, e sse guadagna senza caccià no rano. Le *banche* sguigliano a pietto de cavallo, e la nota de l'*azioniste* è cchiù longa de chella de le nnamorate de D. Giovanne Tenorio.

*Giornale.* Ncagno de storie mo correno giornale, e ssongo d'ogne colore, e d'ogne materia; matutine, vespertine, e sseruoteche; microscopece, e atlantece. Le scienze, e l'arte se ne scolano comm'a ccannele de sivo, ma li giornale so tante lenterne de lo Muolo: lloro nce sarvarranno n'ata vota da li Mamette.

*Meccanica.* La favola d'Orfeo che ccantano, ammanzeva li liune; e lo cunto de li cunte d'Anfione, che sonanno fravecava na cetà, se stanno abberanno a ttiempe nuoste. N'organista a Stralsunda sonanno no strommientto nuovo, s'accostaieno le bestie a quatto piede pe ssentirlo, mmescate ntra l'anemale a duie piede.

*Chirurgia.* A Edimburgo nce steva, poch'anne arreto, na fraveca de nase.

*Economia.* Li vavune nuoste pe scarfarse le mmane, e li piede ausavano li maritozze, che

costavano, pesavano, e sse rompevano : mo nce sta lo iorrino, che te presenta no mattone che resta nfocato pe cinco, o seie ore.

*Triate.* Primmo, ienno a lo triato, non se sapeva comm' accommenzava, e ecomme feneva na tragedia, o na commeddia : mo se sape primma d'auzarse lo sipario. *Atto Primmo* : morarranno, o non morarranno? se sposarranno, o non se sposarranno? *Atto Secunno* : non morarranno, e non se sposarranno. *Atto Terzo* : n' accasione p' acciderse, e pe nguadiarse. *Atto Quarto* : no ntuppo pe scannarse, e ppe sposarse. *Atto Quinto* : ntra no va e bine., ntra no sì e no nò, se conchiude la morte, e lo matremmonio; e bona notte a ttutte.

*Vino.*

Arazio parlaie schitto de lo vino Masseco, e de lo Falerno. No ngrese ave stampata n' opera, ncopp'a li vine, e schitto Nfranza ne conta mille, e quattociente sciorte.

*Manuale.* Li povere stodiente non potevano perdere la salute, lo tiempo, e li denare nfacce a li librazze de dece rotola l'uno : donca s' è ppenzato de stregnere tutto lo zuco de na scien-

zia dint'a uno libbretiello. Donca *Manuale de Fiseca, de Chimeca, d' Architettura, de Politeca*, ec. *La Botaneca* se mpara ntra n'ora, comme fosse lo iuoco de lo *Piripacchio*. Li pagliette trovano tutte li codece de lo munno tra li *Repertorie de Denisart, Sirey, e Dalloz*: l' antiquarie tutte le mmonete antiche dint'a lo libro de *Mionnet*: tutto lo scibbele sta sano sano ntra poche fuoglie stampate da Farcy. Li Calapine te le può portà dint'a la sacca de lo gilè: e accossì la letteratura è avasciata de prezzo; e si primma se spennevano vinte pezze pe no sonetto, mo te ne può accattà dece raziune funèbre.

*Mmescapecca*. Nc' era l'antico mutto:

» *Nell'acqua fonda, e nell'arena semina,  
E spera il vago vento in rete accogliere  
Chi pone sue speranze in cor di femina.*

Lo core de la femmena è rrommaso, gnorsì, doppo tanta siecole sempe de na manera, ma tutto lo riesto de lo mutto se n'è ghiuto a mmonte. Mo se fraveca meglio dint'a ll'acqua, che ncopp'a la preta viva: e sse metteno dint'a l'arena tutte sciorte de chiante, da la cinera-

*ria maritema* peccerella peccerella nfi a la *pi-gna sarvaggia*, che arriva a lo quarto appartamiento.

Non avimmo ncappato ancora lo vïento dint'a la rezza comm'a n'auciello, ma avimmo mperò attaccate li grannele co no filo de paglia; co no velo d'amianto avimmo stutato lo fuoco; e co na punta de fierro strascenammo li frugole addò volimmo nuie.

*Sciampaglione* ave lette, e spiegate li *geroglifese*, e rrappresentano le llettere de l'alfabeto: e uno *geroglifeco* spetta a cchiù de na lettera. Accossì la reggina *Are* pò cagnarse co lo serpente *Ure*; e la ddea *Nefte* co *Fta*; e *Cnef* co *Cnub*.

Simmo arrevate a ffà guapparie grosse. Na noce è addeventata guardarrobba, e ttene guante, cazette, moccatora, ec: Li scialle de lana torchesca passano, e rrepassano pe dint'a n'auciello comm'a no capo de filo pe lo pertuso de l'aco. A Dresda dint'a n'uosso de cerasa nce stanno 180. faccelle de creiature. Na femmena a la cetà d'Agusta fa le statoette che pareno cape de spincole.